




恪靖奏稿初編卷五目錄

逼攻龍湯縣城賊壘情形摺

發給勒伯勒東劄憑片

派兵駐防欽休地方片

已革道員暫緩拏問片

遴員接署甯波知府片

叅辦貪劣知縣摺

攻剿嚴州克復郡城摺

附陳賊情並監放炸礮片

請將知府留浙補用片

請飭部續發米捐執照片

曾銜奏官軍會剿竄徽之賊克復績溪等城摺

請應題應咨各件暫緩辦理片

逼攻龍湯縣城賊壘情形摺

奏爲官軍逼攻龍游湯溪縣城及附城賊壘並分剿金華蘭谿嚴州等處援賊疊獲勝仗兩城尙未克復現籌攻取情形恭摺奏祈

聖鑒事竊

臣

自將油埠裘家堰羅埠湖鎮五星街各要

隘奪獲後令蔣益澧圍攻湯溪劉典駐油埠兼扼湖鎮親督各營於龍游西南兩門外開掘長濠引小溪之水灌之又以東門外寶塔嶺俯瞰賊巢地勢在所必爭九月初十日商之劉培元搶紮三小壘並派各營列隊以

防城壘之賊申刻新壘成各營甫收隊還該逆忽分股急撲意在乘我之倦劉培元親率弁勇極力堵禦臣復飭各營回擊賊大敗走追近壘前城賊復出官軍於昏夜之中混戰逾時約斃賊百餘名鎗礮傷者不計其數賊敗入城乘勢追至城下轟攻良久乃還自寶塔嶺三小壘成賊始奪氣以後併不敢出城拒敵矣是役劉培元督戰甚力所部勇士守備師有勝熊得先手刃數賊皆誤中洋鎗殞命殊爲可惜合計斃悍賊三百餘名而弁勇陣亡者十五名受傷者七十餘名十七夜四鼓臣

派各營分攻城壘五鼓楊昌濬虞紹南率親兵營劉璈率副中營旂攻傍城一壘出賊不意疾趨而前拔開花籬地刺堆草填濠而進連拋火彈適著賊葯筒火起賊亂官軍乘勢肉薄而登其驍勇者直從砲眼鑽入立破堅壘一座壘中之賊數百僅漏逸三四十名賊目杼天安任方海等十餘名均斬擒淨盡奪獲偽印三十餘顆旂幟鎗礮刀矛馬匹悉爲官軍所獲而紅綢蜈蚣形畫龍旂多至二百三十餘面其餘各壘經各營猛攻數時前者中傷後者繼進鏖攻五時之久四壘垂破復完城

賊旋由東門出經王德榜劉璈等截擊斬大旂賊數名
餘敗入城仍固匿不出各營奮力猛攻卒以賊壘鎗礮
太密壯士受傷過多不得已仍收隊而還計是役陣亡
者八十餘名受傷者竟至七百餘名之多爲臣軍向來
未有之事蓋攻堅之難如此十月初二日復派親兵營
副中營旂專攻第一賊壘置各壘不攻以誘其出殊猥
賊仍堅伏不出惟穴牆環開鎗礮無隙可乘久之壘中
悍賊少許各持洋鎗躍出官軍截擊斃其數十而還而
官軍陣亡者已十餘名受傷者又五十餘名各營哨官

受傷者共七名副中營游擊瞿端明創重殞命尤爲可惜此九月初十十八及本月初二日逼攻龍游縣城破一堅壘殺悍賊近千攻城未克之實在情形也蔣益澧一軍派副將熊建益劉清亮謝永祐等與督臣派來助剿之康國器所部分布四門合圍湯城以廣西左江鎮總兵高連陞防金華援賊蔣益澧自駐羅埠防蘭谿援賊東門外山頭賊壘一座堅固異常難以仰攻經蔣益澧派兵逼紮與之相持開挖地道數處分取城壘九月初十等日蘭谿賊目僞天將譚星率黨萬餘上犯圖援

龍湯盤踞江坑花園一帶結壘入座上下十餘里村庄
皆爲賊據直至離羅埠三里外一帶焚掠寬燄甚張十
二日蔣益澧督總兵銜副將劉清亮副將銜叅將周廷
瑞曹魁甲各率所部及馬德順馬隊由左路進同知銜
知縣楊道洽五品軍功李世祥各率所部由右路進副
將何萬華已革都司銜守備徐文秀各率所部由中路
進蔣益澧自率親兵策應諸路誘戰良久該逆不出審
視各處賊壘惟江坑二座較固餘皆易得手遂令楊道
洽李世祥牽制江坑之賊麾中左兩路急進沿途焚賊

館十餘處先破賊小壘一座各壘賊出援縱兵奮擊斃
悍賊廿餘名賊敗歸壘我軍乘勢猛撲王東林何萬華
徐文秀等於砲石中大呼躍入立將三壘蕩平該逆紛
紛遁竄經我軍截殺逼之落水共斃賊六七百名生擒
八十餘名奪獲牛馬數十鎗礮旂幟刀矛無算拔出老
幼男婦以千計追奔至離蘭谿五里又破賊壘二座殲
匪甚多申刻收隊尙餘江坑二壘未破查係譚星自帶
死黨屯紮蔣益澧卽於是夜械約劉典於次日分路往
攻十三日黎明蔣益澧各營齊抵江坑四面圍撲劉典

率所部自伍家圩過河來會併力破其後壘殲賊不少
餘匪見水逃竄被我軍抄擊或死於刃或死於水鮮得
脫者計斃賊近千名生擒百餘名獲騾馬二十餘匹大
小旗幟數百面軍械無數後壘既破合攻前壘我軍氣
勢愈加拔簽椿數丈踰濠二道擁至壘前將火箭火蛋
拋入正在得手之際忽蘭谿援賊麇至當派高連陞劉
清亮徐文秀馬德順楊芳桂等率馬步迎剿斃賊數十
名賊敗退乘勝追至蘭谿縣城對岸沿途賊巢悉數焚
燬復斃賊百餘溺死者無數申刻仍歸大隊奮力攻撲

數次該逆抵死抗拒卒未能下乃收隊而同是夜該逆亦焚壘遁去蔣益澧派兵追之斬殺及溺死者約數百名自羅埠至蘭谿之路一律肅清十一十二等日探報金華援賊竄至湯溪城東二十里之白龍橋一帶延燒村房烟燄四起當經劉典高連陞出隊往剿賊自駭卻十五日蔣益澧復派高連陞熊建益率隊潛往搜捕適賊由金華運糧至官軍出不意擊之斬殺多名餘眾竄走高連陞等率馬隊追殺直至距金華府城十里而返沿途復斃賊數十名生擒四十六名湯溪城賊連夜出

撲官軍營盤旋經熊建益劉清亮及康國器等擊却之
屢有擒斬十月初三夜城逆復於東門外搶築二壘南
門城根搶築一壘意在通城壘之氣而留竄金華之路
初四日黎明蔣益澧卽督高連陞熊建益會同康國器
所部飛虎軍何勇揭陽勇昭武軍力攻三時始將賊壘
悉數踏燬共殺賊二百餘名斬斬僞級天義李占魁生
擒十六名奪大旗五十餘面鎗礮器械二百餘件此蔣
益澧會督湘軍閩軍圍攻湯溪及與劉典會剿蘭谿金
華援賊獲勝之實在情形也蘭谿譚逆自江坑敗遁後

於近城一帶築壘固守並時至溪西虹霓山施家灘厚
仁寺女埠等處往來剽掠二十四日劉典督黃少春朱
明亮楊鼎勳楊芳桂等馬步四營會合白露山民團進
剿該逆見我軍至卽紛紛退走過河我軍乘勢追擊至
樟木村地方賊入壘拒守黃少春督勇從壘後斬關直
入楊鼎勳督隊截其前門登時踏破該逆踰牆而出者
陷於濠坑籬椿之中皆殲焉約斃賊六七百名時上下
村壘復出賊千餘來援經朱明亮楊鼎勳等分路迎擊
賊大潰追殺至近蘭谿城邊斃賊約又數百日暮敗隊

過河譚逆復率黨千餘合敗賊來犯劉典飭各營扼河
堵禦令朱明亮率隊從左路截殺鎗傷先鋒悍賊十餘
名賊衆奔竄溺死者又數十人計此次共斃賊千餘名
內有僞侯十一名生擒三十餘名內僞丞相六名奪僞
印三十顆僞官照七張騾馬五十餘匹旂幟器械無算
該逆經此痛剿復糾合義烏浦江及嚴州分來之賊於
金華江蘭江西岸潛修堅壘意圖抗拒十月初二日蔣
益澧劉典各派兵分途往攻未能得手雖截殺蘭谿援
賊百數十名而蔣益澧所部副湘等營共陣亡八十三

名受傷者數十名緣地曠路歧收隊時爲伏賊所害也
賊目譚星之弟譚富擁衆萬餘屯踞嚴州府城並於近
城數十里內節節設卡河下安泊戰船阻我進攻之路
候補知府魏喻義率所部二千人自遂安移紮淳安縣
銅關及壽昌縣城攻破泮溪賊卡斬逆目黎滿志餘衆
悉降十月初三日復會合紳團攻破嚴州北路三卡殲
匪數百名奪偽印四顆初四日嚴城踞匪分股竄至南
路黃山頂一帶將合蘭谿賊上犯當卽派隊合民團擊
敗之擒斬頗多此劉典魏喻義分剿蘭谿嚴州賊匪獲

勝之實在情形也總計龍游湯溪蘭谿嚴州諸處大小數十戰攻破賊壘賊卡三十餘處殺悍賊六七千名大小賊目近百名戰事尙順惟各城及附城諸壘堅不可拔每猛攻一次將士之奮勇最著者多帶鎗礮子傷或登時殞命緣猾賊知官軍不可力敵遂以死守城壘穴牆開礮爲得計城壘之外濠溝深濶木椿地針環濠數十丈遍地密布不能容趾官軍逼攻愈猛傷亡愈多而龍游湯溪兩城爲金華要道必兩城下後路清而後可攻金華蘭谿一水直達嚴州必蘭谿下餉道通而後可